

Seguridad factor cardinal den scogemento di un vacacion

A.T.A. orguyoso di ta contribui na continuidad y actividadnan di Aruba Hospitality & Security Foundation



DIARANSON a wordo yama un conferencia di prensa unda Minister di Turismo Otmar Oduber, CEO di Aruba Tourism Authority Ronella Tjin Asjoe-Croes y presidente di Aruba Hospitality & Security Foundation James Hepple a elabora riba plan y actividadnan di Aruba Hospitality & Security Foundation (AH&SF). Minister Oduber a pone enfasis riba trabou duro cu e ekipo di AH&SF cu ta traha estrechamente cu polis a bin ta hiba, y a reconoce tambe retonan cu ta enfrente riba e area di seguridad y criminalidad, indicando cu combati retonan no ta un tarea di cuerpo policial so, pero di un y tur. Ta p'esey mes e ta contento cu pa medio di A.T.A. Sui Generis por a sigui brinda sosten na AH&SF, y cu a base di resultadonan positivo di A.T.A. por evalua un incremento di e sosten aki tambe.

Jim Hepple a duna un splicacion amplio di e actividadnan programa pa e aña aki y cual ya ta den ehecucion. Fondonan cu AH&SF ta ricibi ta wordo apropiadamente presupuesta segun ley-, statuutnan di Gobierno y A.T.A. Esaki ta wordo inverti den ekiponan cu ta facilita patruya di nos polisnan riba caya, camindanan publico, beach y hasta lama. Cu

esaki nos agentenan policial ta mas ekipa y mas visibel den areanan turistico. Inversioannan a wordo haci den auto-, quadracer-, boto-, waverunnernan y seguro apropiada, AH&SF ta colabora hunto cu KPA pa entrena agentenan tambe. Un total di 25 agente nobo lo subi caya y enforsa nos cuerpo policial entrante luna di augustus binidero. Algo cu ta vital pa preveni crimen y proteha nos bishitantenan- pero tambe nos propio hendenan. Un sistema di camara mobil tambe ta cay bao di e plannan di AH&SF e aña aki.

A.T.A. pa medio di su CEO a gradici sr. Hepple y henter e ekipo di AH&SF pa nan dedicacion continuo. Pa A.T.A. ta un honor y placer di por haci posibel cu un organisacion manera AH&SF por continua cu su trabaonan. Un organisacion cu ta wordo mira varios biaha como un modelo den Caribe, marando e aspecto di seguridad cu e industria turistico. Na final di 2016 A.T.A. Sui Generis lo a inverti AWG 4.3 miyon den AH&SF, basa riba un contribucion anual di AWG 720 mil. Aparte di esaki A.T.A. a muestra di ta dispuesto pa yuda cu otro proyectonan tambe. Asina a pone fondo disponibel na dado momento pa yuda

cu e problema di 'adictonan ambulante' den area di Oranjestad. Tambe A.T.A. a financia compra di luznan LED cu lo wordo instala den e area di Highrise Hotel e siman entrante. Esaki ta den colaboracion estrecho cu DOW. Luznan LED a wordo cumpra pa e area dilanti di terminal crucero tambe. Ademas, A.T.A. a inverti conhuntamente cu TPEF den boeinan, enfocando riba e seguridad den nos awanan. Den cuadro di esaki tur partido a enfatisa e importancia di e introduccion di e Beach Policy tambe unda atrobe AH&SF a hunga y lo sigui hunga un papel clave.

A.T.A. ta haci investigacion continuamente y recien a completa un estudio bao di 5.400 bishitantenan afluente di Merca. A base di esaki por remarka cu 'seguridad' ta e factor #1 ora di scoge un destinacion pa vacaciona. Aña pasa un estudio bao di 1.800 'first timers' a indica cu 66% di e bishitante ta pensa cu Aruba ta un isla 'very safe', y un 26% ta indica cu Aruba ta 'safe'. Esaki ta bon, pero mester keda un punto di atencion cardinal y di prioridad hopi halto. Nos mester keda auto critico y keda ta consciente di e hecho cu retonan cu ta confronta ta bira mas y mas.